



**Crna Gora**  
**Ministarstvo vanjskih poslova i evropskih integracija**

**Broj: 014/2-16/138**

**Podgorica, 24. oktobar 2014.**

**PLATFORMA**

***za učešće potpredsjednika Vlade i ministra vanjskih poslova i evropskih integracija Crne Gore dr Igora Lukšića na VI Aspen ministarskoj konferenciji zemalja jugoistočne Evrope, Berlin, SR Njemačka, 05. novembra 2014.***

**Opšte informacije**

*Institut Aspen je međunarodna neprofitna organizacija koja podstiče liderstvo zasnovano na vrijednostima i otvoreni dijalog o savremenim pitanjima. Osnovan je 1950. u Sjedinjenim Američkim Državama. Pored njemačkog, postoji još osam, nezavisnih Instituta u Francuskoj, Italiji, Češkoj, Rumuniji, Španiji, Japanu, Indiji i Meksiku. Institut Aspen, sa sjedištem u Berlinu, osnovan je 1974. kao prvi međunarodni institut van granica Sjedinjenih Američkih Država, a njegova misija se sastoji u promovisanju međunarodnog dijaloga o vrijednostima, idealima i idejama neophodnim za savladavanje izazova globalizovanog svijeta. U tu svrhu, njemački Institut Aspen poziva vodeće ličnosti iz oblasti politike, biznisa i društva da učestvuju u konferencijskim programima i grupama za diskusiju.*

*VI konferencija ministara vanjskih poslova jugoistočne Evrope će u organizaciji Instituta Aspen Njemačke, i u saradnji sa ministarstvima vanjskih poslova Njemačke i Ujedinjenog Kraljevstva, te uz pokroviteljstvo ministara vanjskih poslova dvije države Frank-Valtera Štajnmajera i Filipa Hemonda, biti održana u prostorijama Ambasade Ujedinjenog Kraljevstva, odnosno hotela Regent, u Berlinu, 05. novembra 2014.*

***Učešće potpredsjednika Vlade i ministra vanjskih poslova i evropskih integracija Crne Gore dr Igora Lukšića na VI Aspen ministarskoj konferenciji zemalja jugoistočne Evrope***

Agenda Konferencije podrazumijeva početak sa radnim ručkom, uz učešće ministara vanjskih poslova, jednog broja poslanika Bundestaga i državnog ministra za Evropu u njemačkom Saveznom ministarstvu vanjskih poslova, Mihaela Rota, nakon čega slijedi ekonomski panel, a potom i panel diskusija ministara vanjskih poslova, uz učešće njemačkog i britanskog ministra vanjskih poslova Frank-Valtera Štajnmajera i Filipa

Hemonda. U nastavku je predviđena radna večera koju će za svoje kolege upriličiti njemački šef diplomatije Frank-Valter Štajnmajer. Moderator Konferencije biće Ekart Štratenšulte, predsjednik Evropske akademije Berlin.

Kada je riječ o temama ovogodišnje Konferencije, akcenat će biti na opštoj ekonomskoj situaciji, te pitanjima iz domena evropske i euroatlantske agende zemalja jugoistočne Evrope, sa fokusom na vladavinu prava, slobodu medija, reformske procese itd.

Crnu Goru će, na poziv ministara vanjskih poslova Njemačke, odnosno Ujedinjenog Kraljevstva, kao ovogodišnjeg ko-organizatora, predstavljati potpredsjednik Vlade i ministar vanjskih poslova i evropskih integracija dr Igor Lukšić.

### ***Značaj učešća Crne Gore na Aspen konferenciji ministara vanjskih poslova zemalja jugoistočne Evrope***

Rekonsilijacija, stabilizacija i unapređenje dobre vladavine u Regionu, konsolidacija zapadnog Balkana, njegova integracija u EU i, konačno, njegova integracija u euroatlantske strukture ostaju centralni izazovi za Evropu i transatlantsku bezbjednosnu politiku. S druge strane, aktuelna kriza javnih finansija i slab ekonomski rast u Evropi učinili su da jedna od ključnih tema ovogodišnje Aspen konferencije bude upravo ekonomski razvoj jugoistočne Evrope, kao osnova za dugoročnu stabilnost i bezbjednost Regiona.

Cilj Konferencije je da visokim zvaničnicima iz jugoistočne Evrope, Njemačke, Ujedinjenog Kraljevstva, EU i SAD pruži mogućnost za temeljnu, sveobuhvatnu diskusiju o aktuelnim temama i da identifikuje načine za tješnju regionalnu saradnju na putu integracija u evropske strukture. Kao i u prethodnim godinama, poseban aspekt događaja biće ograničen broj učesnika i atmosfera povjerljivosti u uvodnom segmetu konferencije koji će biti održan iza zatvorenih vrata.

Visoki zvaničnici Crne Gore već tradicionalno uzimaju učešće na navedenom ministarskom skupu: ministar vanjskih poslova i evropskih integracija Nebojša Kaluđerović učestvovao je na Aspen konferenciji, novembra 2012, dok je ministar Milan Roćen učestvovao na konferencijama održanim u decembru 2011/2010/2009.

U tom smislu, Konferencija će biti prilika da se, tokom panela i bilateralnih susreta, afirmiše crnogorska politika dobrosusjedskih odnosa i regionalne saradnje, kao neizostavnog preduslova za unapređenje ekonomskih prilika u svakoj od država i Regionu u cjelini, te ostvareni rezultati Crne Gore tokom reformskih procesa u okviru evropskih i euroatlantskih integracija.

Biće to prilika da se, nakon predstavljanja Petog ANP-a, 17. oktobra, čime je Crna Gora započela novi ciklus u okviru MAP-a koji uključuje period intenziviranih i fokusiranih razgovara, još jednom naglasi da članstvo u NATO-u ostaje vanjskopolitički prioritet Crne Gore i da će Vlada ostvariti očekivane rezultate i dati argumente koji će ubijediti članice da donesu pozitivnu odluku o članstvu krajem 2015.

Konferencija će biti prilika i da se ponovi da Crna Gora ostaje privržena ispunjavanju obaveza u okviru pristupnog procesa EU, nakon nedavnog Izvještaja Evropske komisije

koji ukazuje na ostvareni napredak i preostale izazove, od kojih su neke, poput vladavine prava, i u fokusu NATO-a. Ujedno, biće naglašeno da će Crna Gora nastaviti da njeguje dobrosusjedske odnose, kroz posvećenost različitim modalitetima regionalne saradnje koji doprinose stabilnosti i bezbjednosti regiona zapadnog Balkana. S tim u vezi, potpredsjednik Vlade i ministar vanjskih poslova i evropskih integracija dr Igor Lukšić će, takođe, ukazati na značaj Konferencije o zapadnom Balkanu, koja je pod pokroviteljstvom njemačke Savezne vlade održana 28. avgusta 2014. u Berlinu, čime je Njemačka na jasan način potvrdila svoju posvećenost Regionu i zainteresovanost za doprinos njegovom daljem integrisanju u evropske i euroatlantske strukture.

### **Sastav delegacije:**

Delegaciju Ministarstva vanjskih poslova i evropskih integracija Crne Gore predvođiće potpredsjednik Vlade i ministar vanjskih poslova i evropskih integracija dr Igor Lukšić, a u delegaciji će biti i:

— Vera Joličić-Kuliš, ambasador Crne Gore u Saveznoj Republici Njemačkoj.

Troškove boravka i puta potpredsjednika Vlade i ministra vanjskih poslova i evropskih integracija Crne Gore dr Igora Lukšića i delegacije pokrivaće Ministarstvo vanjskih poslova i evropskih integracija.

### **Predlog Zaključka:**

Vlada Crne Gore je, na sjednici od \_\_\_\_\_2014, razmotrila i usvojila Platformu za učesće potpredsjednika Vlade i ministra vanjskih poslova i evropskih integracija Crne Gore dr Igora Lukšića na VI Aspen ministarskoj konferenciji zemalja jugoistočne Evrope, Berlin, SR Njemačka, 05. novembra 2014.

Istovremeno, Vlada je odredila članove delegacije koju predvodi potpredsjednik Vlade i ministar vanjskih poslova i evropskih integracija dr Igor Lukšić:

— Vera Joličić-Kuliš, ambasador Crne Gore u Saveznoj Republici Njemačkoj.